

臺灣之革命運動

章錫琛

臺灣爲太平洋內巨島。朱明之末。鄭成功嘗據之以抗清。及康熙時。清軍既滅鄭氏。遂置府縣治。隸於福建。自是歸中國統轄者。凡二百數十年。光緒甲午之役。師敗於日。與日人訂約於馬關。遂以臺灣割日本。然華人之在臺者。休養生息。歷年久長。生齒蓋已繁殖。日人既有其地。所施政治。頗不便於臺民。而其官吏商賈。又不免多所凌侮。遂使臺中人民。疾首蹙頞。莫可赴訴。加之自由民主之說。瀰漫東亞。島中俊秀之士。亦莫不受其刺激。而生奮興之志。及前年我國革命告成。臺灣華族。目視祖國民主之業。成於俄頃。同爲黃帝子孫。乃獨屈服於異國之下。不克同享共和之幸福。而水深火熱。猶且焚溺靡已。苦痛與歎羨。交迫於中。遂不遑審度時勢。熟權利害。遽謀揭竿獨立。以從事於革命運動矣。

臺灣革命之運動。發於去年八月中旬。以羅福星吳覺民等爲之倡。羅氏爲臺北新竹廳人。居苗栗一堡手欄湖莊。少時。就學於苗栗學校。嘗以日本明治三十九年。來華觀光。民國元年八月。偕吳覺民返臺灣。覺民本廣東嘉應州鎮平縣人。以明治三十二年改隸日管。惟仍往來中國南方。爲新聞記者。羅等久蓄大志。其黨人有黃光樞葉水全吳頌賢吳揚德等。集合頗衆。及是返自中國。以爲中國革命之成。若是其易。事在人爲。區

區臺灣。豈難傳檄而定乎。於是與其黨盡力鼓吹革命。自稱承中國官吏密旨。組織臺灣獨立軍。約入軍者。先納金五圓。隸獨立軍兵籍。舉兵之日。兵士一人。每月給餉銀六十圓。戰死者則給撫卹金。並置專員。勸募島中華人入軍。復出保證金以堅其信。遇士紳之有力者。則告以成功之後。當申請中國政府。任命爲各廳廳長。臺灣華人。既久苦日人之虐。一旦聞革命之說。皆歡欣鼓舞。喜自是得脫羈縛。故不數月間。驟達五六萬人。其根據地。雖在臺灣北部之新竹廳。臺北桃園宜蘭臺南臺中阿緱等處。皆爲革命勢力之所及。而桃園廳下之中壠安平鎮咸菜礮。新竹廳下之苗栗支廳大湖支廳三叉河通霄。尤爲衆盛。羅等既集事。遂定計於八月三十一日皇天長節之期。大舉起兵。八月中旬。遂發難於新竹廳下之大湖支廳。連絡臺人巡查某。攻破支廳之槍械庫。掠奪槍械八百支。子彈稱是。日吏聞警。卽遣兵擊之。革軍卒以勢力不敵。爲日兵所克。吳覺明黃光樞等三百餘人皆被縛。羅福星當時亡匿。旋亦就禽。於是革命之運動。遂告失敗。

日人當發覺是舉之初。以爲區區臺人。烏有革命之思想。特假名以斂錢已耳。及破其機關。發其計畫。而後知其志不在小。其所以謀脫日本之羈絆者。固出於至誠也。事發後三日。臺灣

25236
民政長官內田氏。親赴新竹廳。大饗各支廳廳長及士紳之有嫌疑者。善詞撫慰。復設臨時法院於新竹廳屬之苗栗。任命臺北

地方法院院長安井勝次檢察官長小野得一郎爲臨時法院院長及檢察官長。以大正二年十一月二十六日開庭審判。小野檢察官蒞庭時。陳述此事起訴之理由曰。日本之有臺灣。十九年矣。而重大之逆案。忽發生於今日。此誠國家不祥之兆。而使吾人抱無窮之恨者也。夫此事之動機。蘊釀於中華之革命。而亦由日政府施政不能盡愜民心之故。臺人之圖此大舉。蓋猶水中擲石。其波浪乃愈擴而愈大。今其黨羽幾遍於全島矣。黨魁羅福星。僅二十八歲之青年。初未嘗有社會之知識與經驗也。乃自中國歸來以後。竟能網羅怨日之臺民。而冶爲一爐。固非特其

人之才能。亦以見臺民積怨之久。非一朝一夕之故也。此案爲太湖支廳所探悉。當破獲時。搜得之證物甚多。而消滅未見者。亦復不少。余於茲案。調查至爲慎重。其被檢舉者。凡二百七十人。而有確據者。則僅一百五十九人。卽今之起訴者是也。詞畢。遂與法院長等向被告詳細推鞠。黃貞敬等咸自承其事。開庭數次。卒依匪徒刑罰令判決。認爲與內地之大逆罪。同一性質。自首魁以下。皆處死刑。

日本自占領臺灣以來。雖嘗有北埔之亂與樹杞林之變。然皆不過受巫覡之煽惑。固未嘗有關於政治也。若夫此次新竹之役。則純粹爲革命之運動。而情事之重大。尤爲自昔之所未見。宜日本臺灣政府之亟亟焉探究亂源。而急圖善後之策也。